

# Relatóriu Annual 2023



Forum Komunikaun ba Feto Timor-Lorosa'e – Fokupers  
Rua de Direitus Umanus No. 4, Farol, Dili  
Tlf: 6703321534, Facebook: Fokupers Timor  
[www.fokupers.org](http://www.fokupers.org)

---

## I. Empoderamentu Sobrevivente

Durante 2023, Fokupers rejista no atende vítima VBJ hamutuk na'in 563, husi total número ne'e vítima ne'ebé asesu ba Fokupers nia seletór<sup>1</sup> iha Dili hamutuk 264, iha Uma-Tranzitóriu Suai (UTS) hamutuk 73 no Uma-Mahon Maria Tapó (UMMT) na'in 64.

Husi total número ne'ebé, sira ne'ebé asesu ba Uma-Mahon mak hamutuk 363, iha Uma-Mahon Adulto Dili (UMD) hamutuk vítima na'in 85 no dependénsia<sup>2</sup> na'in 50, iha Uma-Mahon Labarik (UML) vítima na'in 23 no dependénsia na'in 7, UTS vítima hamutuk na'in 78 no dependénsia na'in 56, no mós UMMT vítima na'in 37 no dependénsia na'in 27. Entre sira ne'e, vítima husi period uluk ne'ebé kontinua hela iha Uma-Mahon adultu hamutuk vítima 7 no dependénsia na'in 4. vítima husi peiordu uluk ne'ebé kontinua hela iha Uma-Mahon labarik hamutuk na'in 10. Sira husi periodu uluk ne'ebé seidauk fila ba uma no comunidade tanba kestaun seguransa, ho kazu liuhusi ida ne'ebé família rasik la pronto atu asegura sira nia prezensa atu fila fali ba Uma, tanba kazu seidauk konklui no mós autór krime sira sei livre hela iha comunidade nia leet.

### Akompañamentu ba Prosesu legal

Alende fornese Uma-Mahon ne'ebé seguru ba vítima sira, Fokupers mós fornese apoiu legal ba vítima sira iha prosesu legal hahu husi sira nia kazu inísiu ne'ebé sira rejista iha Fokupers to'o hotu, inklui halo monitorizasaun ba sira kazu iha setór justisa nian se karik Fokupers la hetan fali informasaun ruma kona-ba vítima sira nia informasaun kontinua husi instituisaun relevante sira legal nian. Total vítima ne'ebé desidi prosesu sira nia kazu iha prosesu legal iha Dili iha 2023 mak hamutuk na'in 213. Sira ne'ebé rejista iha PNTL - VPU hamutuk na'in 49 hodi hetan número NUC, sira konsege rejista iha Defensór públiku na'in 8 hodi halo mediasaun ba kazu abandone fen no oan, sira ne'ebé konsege to'o iha Ministériu Públiku hamutuk na'in 80 hodi tuir dilijénsia, no sira ne'ebé nia kazu konsege rejistu iha Tribunal hodi tuir julgamentu mak na'in 24.

Husi na'in 213, vítima na'in 13 mak mak tenke ba trata dokumentus hodi kompleta rekerementu prosesu legal nian hanesan sertidaun Batizmu no RDTL, ne'e inklui vítima no oan sira nian. Iha mós vítima na'in 8 mak fila hodi rezolve tuir família hafoin sira

---

<sup>1</sup> Fatin dahuluk iha Fokupers ne'ebé simu, rekolla no analiza vítima sira nia informasaun hotu no analiza risku hotu hafoin fó ba sira opsaun ba solusaun atu sira decide, ezp. se sira sira hili atu hela iha Uma-Mahon ou fila ba Uma, nst.

<sup>2</sup> Maioria mak vítima sira nia oan sira ne'ebé mai tuir sira iha Uma-Mahon hafoin sira hetan problema iha sira nia Uma no possibilidade bele mós sira nia inan ou bin sira ne'ebé presiza duni atu akompaña sira tanba kestaun saude no kestaun spesífiku balun ne'ebé presiza duni família nia prezensa atu hamutuk ho sira.

---

hetan informasaun husi funsionáriu Fokupers nian kona-ba prosesu. Iha mós na'in ida mak konsege refere ba organizasaun seluk tanba la tama iha kategoria VBJ no na'in 30 mak decide lakohi prosesa sira nia kazu hafoin hatene tiha katak prosesu ba kazu sivíl la'ó kleur tebes no tenke sakrifika sira nia tempu no ezije orsamentu atu kontinua prosesu liu-liu sira ne'ebé mai husi distansia dook, transporte susar no laiha osan atu seluk transporte no kuaze husi sira mak la hetan apoiu husi família no comunidade.

Husi vítima na'in 24 sira nia Kazu ne'ebé rejistu iha Tribunal, amenta tan ho na'in 2 nian ne'ebé lori husi periodu tinan 2022 mak hetan desizaun final katak kazu 17 mak hetan pena prizaun, kazu 4 hetan pena suspensaun, kazu 2 mak hetan pena alimentasaun, no kazu 3 mak hetan absove.

Nune'e mós total vítima ne'ebé hetan akompañamentu legal husi UMMT iha 2023 ba vítima adultu mak hamutuk na'in 69, Sira ne'ebé rejista iha PNTL - VPU hamutuk na'in 24, sira ne'ebé konsege rejistu iha Ministériu Públiku hamutuk na'in 11 no sira ne'ebé nia kazu konsege lori ba prosesu iha Tribunal mak na'in 13 inklui Tribunal movel ba na'in 6.

Husi sira ne'e, na'in 1 mak mak tenke trata dokumentus/RDTL ba nia oan hodi kompleta rekerementu prosesu ba kazu alimentasaun iha MP. Iha mós vítima na'in 9 tenke reunifika fali ba família tanba vítima rasik decide no tanba laiha risku ne'ebé bo'ot liu, hafoin hala'ó mós mediasaun ba vítima na'in 9 ho sira nia família tanba katoria ba kazu sivíl ne'ebé hadau malu labarik no mós abandona sira nia responsabilidade nu'udar aman no laen. Iha mós vítima na'in 2 ne'ebé mai konsulta deit kona-ba sira nia kazu hamutuk ho ofisial legal hodi haree kona-ba prosesu alimentasaun.

Husi vítima na'in 24 sira nia Kazu ne'ebé rejistu iha Tribunal iha 2023, amenta tan ho na'in 2 nian ne'ebé lori husi periodu tinan 2022 mak hetan desizaun final katak kazu 17 mak hetan pena prizaun, kazu 4 hetan pena suspensaun, kazu 2 mak hetan pena alimentasaun, no kazu 3 mak hetan absove.

Kazu ne'ebé hetan rezultadu final iha tribunal iha 2023 mak husi vítima na'in 13 no amenta tan kazu vítima na'in 6 nian ne'ebé lori husi 2022, pena hirak ne'e mak hanesan suspeitu na'in 12 hetan pena prizaun ne'ebé maioria kazu VD, suspeitu na'in 2 mak hetan pena multa ho valor \$25 husi kazu VD, suspeitu na'in 1 mak hetan pena prizaun fulan 6 no suspende ba tinan 1 husi kazu VD, suspeitu na'in 1 hetan pena alimentasaun ho valor \$50/fulan husi kazu sivíl tanba abandona responsabilidade aman nian, no ikus suspeitu na'in 3 mak hetan pena absolve tanba ofensas integradu fíziku simples nune'e ikus Tribunal decide omologa kazu tanba mai husi desizaun no konsentementu vítima

---

no suspeitu iha Tribunal. Kazu hirak ne'ebé presiza halo monitorizasaun hodi informa fali ba vítima tanba laiha informasaun husi instituisaun legal sira iha 2023 mak hamutuk 29, kompostu husi Polísia iha kazu 19, MP iha kazu 4 no Tribunal iha kazu 6.

Kazu espesífiku ba vítima menor nian na'in 28 mak konsege hetan akompañamentu ba prosesu legal iha 2023 mak na'in 10 hetan akompañamentu ba PNTL-VPU, na'in 5 mak ba tuir dilijénsia iha MP tanba kazu VD, abuzu seksual ba meno no abandona hodi prosa atu hetan alimentasaun, no na'in 6 mak tuir julgamentu iha Tribunal tanba kazu Asédiu sexual ba menor no VD ba menor ne'ebé mai husi kazu 2019, 2020 no 2022. Iha mós kazu abuzu seksual no VD husi vítima na'in 6 nian mak adia fali ba 2024, kazu 6 ne'e mai husi kazu 2021, 2022, no 2023.

Total kazu husi periodu antes 2022 no periodu 2023 ne'ebé hetan desijaun Final iha Tribunal ba kazu menor 6 mak husi kazu Abuzu seksual ema na'in 5 no violénsia Doméstika ba labarik 1, pena prizaun ba suspeitu na'in 12 husi kazu VD, pena multa ba suspeitu na'in 2 husi kazu VD no multa \$25, pena suspensaun ba ema na'in 1 husi kazu VD ho pena prizaun fulan 6 hafoin suspende ba tinan 1, pena alimentasaun ba ema na'in 1 husi kazu sivíl ne'ebé decide atu aman fo \$50/kada fulan no Absolve ba kazu 3 husi ofensas integradu fízika simples nune'e tribunal decide hodi omologa kazu ne'ebé desizaun mai husi vítima no suspeitu iha Tribunal.

### **Akompañamentu ba asesu Saúde**

Durante iha Uma-Mahon, Fokupers fornese mós apoiu ba asesu saúde hanesan konsulta regural vítima no oan sira hanesan inan ho kondisaun isin-rua, sira ne'ebé moras durante iha Uma-Mahon inklui vasina ba bebe sira mak total na'in 79 husi vítima na'in 59 no oan/bebe sira na'in 20. Durante 2023 Iha vítima ne'ebé partu no bebe moris iha Uma-Mahon hamutuk na'in 7, na'in 4 husi Uma-Mahon Dili, na'in 2 husi UTS na'in 2 no UMMT na'in 1.

### **Apoiu Psikososial**

Apoiu Psikososial ne'ebé durante ne'e Fokupers fornese ba vítima na'in ne'ebé hela iha Uma-Mahon no mós ba sira ne'ebé reintegra ona ba família bazeia ba nesesidade. Vítima hirak ne'ebé hetan apoiu Psikososial husi Fokupers hamutuk na'in 313, iha Uma-Mahon Dili no UTS hamutuk na'in 256 no iha UMMT hamutuk na'in 59.

Atividade Psikososial ne'e inklui akonsellamentu individual, akonsellamentu grupu no terapia nu'udar prosesu kura atu vítima sir abele rekopera fali husi sira nia situasaun. Akonsellamentu individual ne'e obrigatóriu ba vítima sira hotu ne'ebé iha Uma-Mahon maibé ba akonsellamentu grupu bele hala'o muito menus fulan ida dal aida. Ba atividade terapia barak liu mak halo atividade sira hanesan ezersísiu, ezp. yoga no

---

Zumba, lori sira sai husi Uma-Mahon inklui ba Tasi no bele liu mós liuhusi kreatividade sira hanesan teian, suku no halo to'os Uma-hun.

Atividade terapia ba labarik, alende atividade sira hanesan vítima adultu nian ita fornese mós atividade extra-ordináriu sira hanesan pinta, hakerek, halimar ho lego no mós dansa atu tulun sira hodi espresa sira nia emosaun no liu-liu atu sira bele besik liutan ho konsileira no servisu-na'in social sira hodi fahe sira nia istória sira ne'ebé sira seidauk pronto atu fó sai hotu.

### **Apoiu ba Reintegrasaun**

Vítima sira ne'ebé reintegra fali ba familia hafoin fila husi Uma-Mahon hafoin halo avaliasaun ba sira nia kazu no tetu mós risku sira no ho sira nia konxientementu rasik tan sira rasik prontu hodi fila ba hamutuk ho familia no comunidade, sira hirak ne'e kuaze sira ne'ebé sira nia prosesu legal la'o hela maibé lahó risku boot no sira balun mak kazu konklui ona no seguru atu fila ba uma.

Sira ne'ebé reintegra ona ba família no comunidade hamutuk na'in 160, husi Uma-Mahon Adultu Dili na'in 46, Uma-Mahon Labarik iha Dili na'in 8, UTS Covalima na'in 73 no UMMT Bobonaro hamutuk na'in 33. Reintegra mós dependénsia ou oan sira ne'ebé mai akompaña inan sira hamutuk na'in 88 iha ne'ebé na'in 64 husi Dili no Covalima no na'in 24 husi UMMT Bobonaro.

Fatin atu reintegra vítima ida depende ba aseitasaun husi vítima maibé mós bazeia ba avaliasaun no levantamentu husi ekipa Fokupers iha terenu hodi haree kona-ba kestaun seguransa no apoiu husi família ne'ebé sei deside liuhusi enkontru jestaun kazu husi ekipa Fokupers no possibilidade liuhusi konferénsia kazu hamutuk ho parseiru sira liu-liu ba kazu labarik.

### **Apoiu Ekonomia**

Husi sira ne'ebé reintegra ba família iha tinan 2023 Fokupers identifika no fornese apoiu fundus kiik ba sobrevivente na'in 27 inklui fornese treinamentu ba sira hodi hadia sira nia síkulu ekonomia família nian. Sobrevivente hirak ne'e mai husi Ainaro na'in 1, Baucau na'in 1, Bobonaro na'in 4, Covalima na'in 6, Dili na'in 6, Ermera na'in 6, Likisá na'in 1, Manufahe na'in 1 no RAEOA na'in 1. Atividade ekonomia ne'ebé sira hala'o mak loke kios, faan Obralan, Suku ropa, Kuda modo no faan, faan *gorengan* no faan hahan iha dalan ho roda tolu.

Fornese mós apiu bolsu estudu ba sobrevivente foinsa'e no labarik feto na'in 30 iha nível Ensinu Superior no Sekundária no Pre-Sekundária, Sira ne'ebé iha Universidade iha Dili mak na'in 7 no entre sira ida mak husi Eskola Católica Timor-Leste no ida iha UNPAZ. Seluk na'in 23 iha nível Sekundária no Pre-Sekundária, beneficiária husi husi

---

Aileu na'in 1, husi Bobonaro na'in 1, husi Covalima na'in 1, husi Dili na'in 8, Likisá na'in 2 no husi Manufahi na'in 10.

Apoi u ba fundus kiik no bolsa estuda liuhusi assessment no avaliasaun ba sira nia fatin hafoin fornese treinamentu kona-ba oinsa uza osan no halo planu inklui jestaun finanseiru nian molok entrega osan ba sira. Iha fulan Outubru, Fokupers fornese treinamentu kona-ba Mikro-Empreza ba fetu sobrevivente na'in 24 inklui planu negósiu, promosaun ba produktu no analiza merkadu durante loron 3 molok sira simu fundus kiik.

### **Vizita Uma-kain**

Hafoin reintegra ba comunidade, iha 2023 Fokupers kontinua hala'o vizita ba Uma-kain hodi monitoriza vítima sira nia situasaun, sira ne'ebé Fokupers hala'o vizita ba sira nia uma mak hamutuk na'in 20 husi Uma-Mahon iha Dili no nota katak nain 5 mak ekonomikamente independente<sup>3</sup> no sai hanesan xefe família. Husi UMMT konsege halo vizita ba uma-kain 23 no nota katak na'in 3 mai ekonomikamente independente no mos sai hanesan xefe família.

Vítima hirak ne'ebé Fokupers simu mai husi Munisípiu 12 inklui mós ho RAEO.

## **II. ADVOKASIA**

Durante 2023, program Advokasia hala'o atividade oin-oin hodi hasa'e ema nia koñesementu no konxiensia kona-ba VBJ no liu ida ne'e aseguira governu nia komprimisu jéneru ho aproximasaun oin-oin hodi konvense makaer-ukun sira atu bele prodúz no aprova lei ho sensibilidade no inkluzividade hodi bele aseguira alokasaun orsamentu no iha implementasaun ne'ebé responsive ba jéneru. Atividade hirak ne'e mak hanesan tuir mai:

### **Peskiza kona-ba Implementasaun tinan 12 LKVD**

Fokuper's hala'o nia peskiza dahuluk kona-ba implementasaun LKVD hafoin tinan 12 hodi haree kona-ba implementasaun sira inklui lakuna no progresu husi LKVD. Objetivu husi peskiza ne'e mak atu analiza importánsia no impaktu LKVD nian ba fetu sira iha Timor-Leste, liu-liu vítima sira VD, deskobre dí'ak-liutan lakuna sira ne'ebé

---

<sup>3</sup> Sira ne'ebé iha ona rendementu rasik no la depende ba ema seluk, hala'o atividade negósiu, iha uma rasik no husik sira nia oan ba eskola maibe seluk eskola husi sira nia rendementu rasik, inklui konsege kria tan kampu traballu ba ema seluk. Home visit ne'e la inklui ho sira ne'ebé hetan apoiu fundus kiik.

---

kontribui hodi la implementa LKVD ho másimu no mós bele fó sujestaun balu ne'ebé bele suporta revizaun no implementasaun ba LKVD nian.

Peskiza ne'e hala'o iha munisípiu Baucau, Covalima, Dili Ermera, Maliana, Vikeke no RAEOA ne'ebé sai nu'udar area juridisaun. Alvu husi peskiza ne'e mak Júis na'in 4 iha tribunal 4 iha Timor-laran, Prokurador na'in 5, ba defensor na'in 4 ne'ebé representa husi área juridisaun sira. Inklui mós director na'in 4 husi organizasaun Naun governmental sira no ikus mak ho sobrevivente na'in 50.

Peskiza hala'o durante fulan 5 nia laran no lansa iha Janeiru 2023 ho prezensa husi parte oin-oin hanesan membru governu, autór judisiáriu, ministériu relevante, parseiru sociedade sivíl no doador sira. Atu bele hatene diak liutan konteudu relatóriu [Implementasaun LKVD durante tinan 12](#).

### **Formasaun Orsamentu Sensível ba Jéneru ba Autoridade Protesaun Sivíl (APC)**

Iha fulan Fevereiru no Maiu 2023, Fokupers fornese treinamentu ba PC kona-ba Orsamentu Sensível ba Jéneru ba kargu xefia na'in 20 APC nian durante loran 3. Materia sira durante loran 3 mak kona-ba Jéneru no Umanitária, Salva Guarda ne'ebé foku liuba política SEAH no Protesaun Labarik no ikus mak kona-ba Orsamentu Sensível ba Jéneru.

Objetivu husi formasaun ida ne'e mak atu tulun APC nia kargu xefia sira atu bele hatene didiak kona-ba asuntu jéneru liga ho Umanitaria, nune'e iha tempu emerjénsia sira hatene ona oinsa atu bele tulun fetu no labarik sira ho sensível. Alénde ne'e oinsa kargu xefia sira iha koñesementu kona-ba orsamentu sensível ba jéneru liga ho sira nia program rasik.

### **Formasaun VBJ, Mekanizmu Referal no Enkuadramentu Legal**

Iha fulan Fevereiru - Abril 2023, Fokupers fornese formasaun ba instituisaun sociais nian inklui instituisaun relijioza sira ne'ebé iha koléjiu hanesan Koléjiu Canossiana Baucau, Koléjiu Canossiana Covalima, Madre sira iha Tibar, Madre Tunubibi Maliana, Sentru EhD Ahisaun, Sentru EhD Bekora. Atividade ne'e hala'o ba partesipa husi madre no responsavel sira iha koléjiu, menina koléjiu sira no mos maluk sira EhD ne'ebé hela iha sentru EhD nian ho total na'in 250, fetu na'in 183 no mane 67.

Alende iha Instituisaun social sira, Fokupers mós halo sosializasaun ba comunidade sira iha nível suku iha munisípiu Dili, Baucau no Bobonaro, Lospalos no Manatuto hodi envolve lideransa komunitária sira liu-liu xefe suku no xefe aldeia ne'ebé iha

---

responsabilidade hodi atende kazu sira iha suku atu sira bele iha koñesementu diak liutan. 330, ho partespasaun feto hamutuk na'in 210 no feto hamutuk na'in 120.

Objetivu husi atividade ida ne'e mak atu hasa'e madre, responsavel koléjiu, foinsa'e no comunidade enjeral sira nia koñesementu kona-ba asuntu VBJ no mekanizmu referral sira atu nune'e se karik akontese violénsia ruma tantu iha sentru social no iha comunidade sira hatene ona oinsa atu tulun hodi refere kazu sira ne'e ba organizaun relevante sira nune'e sira bele promove edukasaun laho violénsia iha família no iha insituisaun social sira.

### **Diskusaun no Semináriu kona-ba Feto nia Direitu ba Rai**

Problema rai durante ne'e konsidera problema boot iha Timor-Leste ne'ebé rezulta violénsia no ikus ema balun bele lakon vida, problema hirak ne'e dalabarak akontese entre membru comunidade no iha mós possibilidade akontese iha uma-laran ho razaun espesífiku sira hanesan hadau malu rai tanba Inan-aman fahe heransa ne'ebé la hanesan, ou ba Sistema patriarkal mane mak iha liu priviléjiu hetan direitu ba propriedade nune'e halo oan feto laran moras no nune'e mós ba Sistema matreliniar mane mak hetan liu priviléjiu duke oan mane ne'ebé bele kauza ba problema.

Ho situaun ida ne'e, Fokupers hala'o atividade espesífiku hodi hala'o diskusaun ho grupu oin inklui ho vítima no grupu vulneravel sira atu rona sira nia hanoin no bele hetan mós lisaun balun ne'ebé bele mosu durante diskusaun no liu-liu atu fahe informasaun liga ho enkuadramentu legal sira ne'ebé bele proteje feto no liu-liu vítima sira nia direitu ba propriedade. Tanba iha dados Fokupers nian hatudu katak maioria husi vítima sira hafoin hetan tiha VD no tratamentu ne'ebé la justu husi parseiru ne'ebé dalabarak mós ho apiu família nian vítima sira nunka iha direitu ba rai no Uma ne'ebé durante ne'e sira mak hamutuk hodi invesate no koidadu.

Diskusaun ne'e ho objetivu atu tulun vítima no feto maluk sira katak oinsá ita presiza hatene ita nia direitu fundamental sira, inklui oinsá ita bele hatene katak iha lei espesífiku sira ne'ebé durante ne'e proteje hela ita. Diskusaun ne'e hala'o on aba ema na'in 139, entre sira iha feto na'in 127 no mane na'in 12.

Husi treinamentu báziku kona-ba VBJ, Mekanizmu Referral no Enkuadramentu Legal ne'ebé fornese iha instituisaun sosiais no estrutura suku, Fokupers decide hodi fornese treinamentu espesífiku kona-ba Akonsellamentu Báziku hodi tulun Xefe Suku no Xefe Aldeia no estrutura iha Suku ne'ebé responsavel ba kazu atu bele iha abilidade báziku kona-ba Akonsellamentu Báziku hodi tulun sira atu sensível no responsive liutan ba asuntu VBJ. Formasaun ba Akonsellamentu báziku (*basic counselling*) ba VBJ hala'o iha Suku Palaka, munisípiu Bobonaro ba estrutura suku no influenciador sira ne'ebé iha



---

Suku laran inklui foinsa'e sira hamutuk na'in 65, ho partespisaun fetu na'in 34 no mane na'in 31.

Alénde diskusaun sira, Fokupers mós hala'ó semináriu ida hodi integra asuntu Feto nia direitu ba rai iha munisípiu Bobonaro hamutuk ho parseiru sosiedade sivíl hodi celebra loron Nasioanl Feto iha munisípiu refere ne'ebé sai nu'udar munisípiu husi eroina Maria Tapó nian. Selebrasaun ne'e marka mós prezensa husi Ativista senjora no iha mós representante Membru Parlamentu nu'udar Prezidente Komisaun F. Hafoin seremónia partespitante taka ho deklarasan konjunta ida hodi hato'ó sira nia preokupasaun ba na'i-ulun sira iha nasional no iha munisípiu hodi bele responde ba sira nia situasaun iha munisípiu Bobonaron ba konflitu artemarsiais ne'ebé akontese hodi prejudika ba seguransa fetu no labarik sira nian.

[Bele asisté video deklarasaun konjunta husi fetu munisípiu Bobonaro iha ne'e.](#)

### **Diskusaun Fen-laen**

Atividade fen-laen konsidera nu'udar atividade interesante ne'ebé Fokupers hala'ó liuhusi diskusaun Fen-laen ne'ebé foku liu ba fen-laen sira hala'ó Fokupers nia dadus sira hatudu katak abut problema VBJ ne'ebé durante ne'e akontese mak família. Atividade ida ne'e realiza ho kolaborasaun entre Fokupers no lideransa comunidade sira, liu-liu iha Suku Manleuana, Vila-verde no Madohi hodi identifika família sira ne'ebé konsidera vulneravel ba informasaun no sira ne'ebé prezisa tebes atu rona informasaun sira. Atividade diskusaun fen-laen. Atividade ne'e hala'ó ona

Objetivu husi Diskusaun fen-laen mak atu konfense família/ parseiru sira atu fó importánsia ba diálogu no oinsa bele fahe tempu atu bele hatene rona no respeita malu hodi bele buka solusaun ba problema sira ne'ebé akontese iha Uma-laran. Atividade ida ne'e ita hahú hodi esplika kona-ba importánsia husi valor família no komunikasaun iha família laran, ita mós husu sira atu bele identifika rasik sira nia problema iha Uma-laran hafoin sira bele buka maneira hodi fo solusaun ba problema ne'ebé sira hasoru ho komunikasaun ne'ebé saudável sem ema seluk nia intervensaun.

### **Halimar no Aprende**

Hafoin observa difikuldade família hodi hola parte iha atividade oin-oin iha comunidade liu-liu fetu sira nia involvement ne'ebé menus tebes tanba sira tenke tau-matan ba labarik no laiha kondisaun husi organizasaun sira ne'ebé durante ne'e kria atividade iha comunidade mak Fokupers inisia atividade Play & Learning hodi sai nu'udar pakote ba atividade sira seluk ne'ebé hala'ó iha baze hodi bele kria espasu amigável no seguru ba labarik sira hodi halimar no aprende hamutuk hodi goza sira nia tempu labarik nian.

---

Objetivu prinsipal husi atividade *Play & Learning* ou Halimar no Aprende mak atu bele insentiva no enkoraja inan-aman liu-liu feto sira hodi bele hola parte iha atividade sira ne'ebé Fokupers realiza nune'e inan-aman sira bele hakmatek hodi hola parte iha atividade sira ho diak no la preokupa kona-ba siguransa oan sira nian.

Atividade sira ne'ebé fornese ba labarik sira mak halimar brinkedus sira, monta lego, pinta, nst. Durante atividade Halimar no Aprende ne'e hala'o husi Fokupers iha tinan 2023 envolve ona labarik sira hamutuk na'in 560, feto 262 no mane na'in 298.

### **Edukasaun Reprodutivu no Sexual ne'ebé Komprensivu – Síkulu Feto no Mane**

Atu responde ba situasaun atual ba foinsa'e sira hodi prevene violénsia bazeia ba jéneru liu-liu violénsia seksual, abuzu seksual, isin-rua sedu, nst ne'ebé akontese ba foinsa'e sira mak Fokupers deside foku ba program Edukasaun Reprodutivu no Seksual ne'ebé Komprensivu iha nível eskola no mós iha comunidade iha munisípiu Bobonaro, Ermera no Vikeke.

Iha nível eskola, Fokupers kolabora ho hetan apoiu másimu husi Ministériu Edukasaun hodi implementa atividade refere iha eskola sira hodi tama direita ba kada aula iha eskola husi 7o ano – 12o ano iha munisípiu alvu tolu. Fasilitador ne'ebé iha hamutuk na'in 14, feto 7 no mane 7 ne'ebé mai husi munisípiu alvu 3 husi fasilitador foinsa'e sira ne'ebé treinado no hetan ona treinamentu espesífiku kona-ba treinamentu ba treinador.

Fasilitador sira hetan treinamentu durante semana ida fulan Abril hodi prepara sira ho métodu aprendizajen ne'ebé dí'ak husi módulu Síkulu Feto no Mane ne'ebé Fokupers iha molok tun ba eskola sira. Módulu Síkulu Feto no Mane ne'ebé Fokupers iha hetan koñesementu husi Ministériu Edukasaun ho apoiu tékniku UNFPA nian. Módulu refere kompostu husi tópiku prinsipal 10 mak inklui Sé mak ha'u?, Direitu Umanu, Jéneru no Igualdade Jéneru, Komunikasaun, Jere Hirus, Violénsia Bazeia ba Jéneru, Abuzu no violénsia seksual, Isin-rua sedu, Moras hadaet no Literasia Finansa.

Fasilitador sira konsege tama no aplika mótodu aprendizajen ne'ebé sira hetan ho estilu foinsa'e sira nian hodi hanorin iha aula sira, eskola hirak ne'ebé Fokupers realiza atividade ne'e mak hamutuk eskola 28 iha munisípiu alvu 3, munisípiu Bobonaro iha eskola 7, munisípiu Ermera eskola 9 no munisípiu Vikeke eskola 12. Atividade iha eskola hala'o durante fulan ida ho balu husi meadu Juñu to'o Jullu hodi uza 45 minutu iha kada aula kada eskola ba tópiku 10. Husi eskola 28 iha munisípiu 3, estudante sira ne'ebé hola parte iha prosesu aprendizajen ba Síkulu Feto no Mane mak hamutuk 2,696 ho prezensa estudante feto hamutuk 1,521 no estudante mane hamutuk 1,155.

---

La'os de'it atividade aprendizajen hodi tama direita aula sira iha eskola, maibé Fokupers hanoin mós katak importante atu edukador no diretor eskola sira iha mós koñesementu kona-ba asuntu ida ne'e hodi bele hanorin no mós bele tulun estudante sira bainhira labarik sira hasoru problema durante iha eskola hanesan VBJ inklui isin-rua sedu, violénsia seksual ne'ebé bele halo sira trauma ba tempu naruk. Treinamentu ba edukador sira hala'o durante loron rua iha fulan Juñu hodi envolve mestre no director eskola sira husi munisípiu alvu 3 hamutuk na'in 29, feto 1 no mane 28 nune'e mós na'in 8 husi sira mak xefe eskola, na'in 2 husi Bobonaro, na'in 3 husi Ermera no na'in 3 husi Vikeke.

Alende atividade importante iha nível eskola ba estudante no edukador sira, Fokupers hala'o semináriu no teatru comunidade hodi hasa'e ema nia koñesementu kona-ba asuntu saúde reprodutiva ne'ebé komprehensivu no asuntu sira ne'ebé relevante ho VBJ. Semináriu refere, hala'o iha ambitu komemorasaun loron mundial Juventude sira nian iha nível munisípiu iha fulan Augustu ho apoiu no koordenasaun husi President Autoridade Munisípiu 3 hodi envolve foinsa'e sira husi parte oin-oin no parseiru relevante sira husi insituisaun estadu, liña ministériu no sociedade sivíl ne'ebé eziste iha munisípiu 3 no konvida mós oradó prinsipal sira hanesan MSSI, MJDAC, ME, MS, SEPFOPE no Konsellu Juventude Munisípiu hodi fahé kona-ba sira nia papel no responsabilidade hodi investe ba foinsa'e sira hodi responde ba problema juventude liga ho asuntu VBJ no asuntu relevante sira hanesan saúde reprodutiva, isin-rua sedu, Fila hikas ba eskola, Asédiu seksual iha mundu traballu no Sistema referal VBJ iha municipal. Semináriu iha munisípiu 3 ba selebrasaun loron mundial foins'ae nian konsege marka prezensa husi ema na'in 377, feto na'in 154 no mane 223. Husi munisípiu Bobonaru total ema na'in 118, feto na'in 55 no mane 64, iha munisípiu Ermera hamutuk na'in 147, feto na'in 50 no mane na'in 97 no husi Vikeke mak hamutuk na'in 112, feto na'in 49 no mane na'in 63.

Hala'o mós teatru komunitáriu iha nível Postu husi munisípiu 3 ba comunidade sira enjeral hodi fahé kona-ba asuntu relevante sira husi módulu Síkulú Feto no Mane ne'ebé fahé iha eskola sira. Razaun husi teatru komunitária ne'e atu lori direita asuntu Saúde Reprodutiva no asuntu sira ne'ebé relevante ho igualdade jéneru no VBJba comunidade iha baze, liu-liu ba sira ne'ebé la hetan oportunidade atu asesu hola parte iha atividade oin-oin iha sira nia suku ou labele akompaña husi Televizaun, Rádiu no média sosial sira. Grupu teátriku sira ne'e mai husi grupu teátriku foinsa'e husi munisípiu 3, Bobonaro, Ermera no Vikeke. Teatru ne'e konsege uza mós dialetu husi munisípiu 3 hanesan mambae no Tetum Terik hodi bele atraí comunidade sira hodi bele komprende dí'ak liutan. Partesipante husi teatru komunitária husi munisípiu 3 ne'ebé hala'o iha Postu-Administrativu sira hamutuk 1,345 ho partesipasaun feto hamutuk 717 no mane hamutuk 628, iha ne'ebé husi munisípiu Bobonaro nia partesipasaun hamutuk 214, feto na'in 127 no mane 87, husi munisípiu Ermera nia

---

partesipasaun hamutuk na'in 612, feto hamutuk na'in 344 no mane na'in 268 no husi munisípiu Vikeke total partesipasaun hamutuk 519, feo na'in 246 no feto 273.

### **Avaliasaun kona-ba Mekanizmu Referál Violénsia Bazeia ba Jéneru iha Eskola no Prosesu Fila Hikas ba Eskola**

Nu'udar organizasaun ne'ebé inisia no advoke ba asuntu importante sira inklui polítika fila hikas ba eskola ne'ebé durante sai nu'udar agenda advokasia Fokupers, tanba enfrenta problema oin-oin bainhira atu lori fila sobrevivente ne'ebé fila husi Uma-Mahon atu fila ba eskola. Eskola sira seidak iha mekanizmu própriu atu aseguara foinsa'e no labarik sira ne'ebé para sira nia estudu ne'ebé kauza violénsia sexual, abuzu seksual no inestu hodi kontribui bai sin-rua sedu, tanba Governu rasik seidak prevee kona-ba polítika atu lori hikas foinsa'e no labarik sira fila ba eskola hafoin hasoru problema no violénsia iha sira nia moris, liu ida ne'e pesoal edukasaun rasik seidak iha koñesementu no sensibilidade kona-ba asuntu refere.

Asuntu ida ne'e mós sai ona nu'udar atensaun no preokupasaun komité CEDAW liuhusi rekomendasaun CEDAW nian ba estadu Timor-Leste durante period 2015 no 2023 atu governu Timor-Leste hamosu Polítika Fila Hikas ba Eskola. Atu responde ba preokupasaun ida ne'e mak Fokupers realiza avalisaun ou *assessment* kona-ba "Mekanizmu Referal VBJ iha Eskola no Prosesu Fila hikas ba Eskola" iha fulan Augustu hodi kontribui dados no prova sira ba governu hodi hamosu Polítika Fila hikas ba Eskola. Amostra ba avaliasaun hala'o iha munisípiu 4 iha Bobonaro, Dili, Ermera no Vikeke ba estudante, edukador no asosiasaun inan-aman hamutuk na'in 108, ho partesipasaun feto hamutuk na'in 59 no feto na'in 49. Hala'o mós Grupu Diskusaun Foku ba parseiru xave Rede Referal VBJ nian hanesan VPU, ALFeLa, JSMP, PRADET no Uma-Mahon sira hamutuk na'in 23, ho partesipasaun feto na'in 13 no mane na'in 10. Rezultadu no relatóriu husi avaliasaun ne'e sei lansa iha Fevereiru 2024.

### **Advokasia iha nível nasional no internasional**

Atu hadia Sistema públiku no enkuadramentu sira ne'ebé sensível ba vítima sira mak Fokupers halo esforsu oin-oin atu aseguara duni vítima sira nia interese liuhusi:

- Kria fila fali koordenasaun ho Ministériu Justisa hodi haree kona-ba prosesu atendentu Sertidak Moris ba bebe no labarik sira ne'ebé moris iha Uma-Mahon.
- Hamutuk ho ALFeLa no JSMP ho lideransa SEI no Ministériu Justisa ho apoiu tékniku husi TAF – Program Nabilan prepara hela **ezbosu ba Revizaun LKVD**.
- Hamutuk ho ALFeLa, JSMP no PRADET ho lideransa Adjunto Prokurador Jeral ho apoiu husi ADB kontribui hodi dezenvolve Matadalan

---

**Investigasaun ba Ofensas Violénsia Bazeia ba Jéneru** ba Ministériu Púbuliku hodi tulun pesoal sira MP durante prosesu kazu VBJ.

- Halo analiza no pareser ba Komisaun F Parlamentu Nasional kona-ba ezbosu Lei Protesaun Labarik no Jovem iha perigu.
- Halo analiza no pareser ba Presidente PN no membru Parlamentu hotu kona-ba Lei indultu.
- Hatama pareser ba PN: Komisaun F, Komisaun C no GMPTL kona-ba orsamentu sensível ba jéneru liu-liu kona-ba orsamentu Orsamentu ba Uma-Mahon sira nian.
- Enkontru ho Prezidente Republika hodi fahe kona-ba OSJ ba Uma-Mahon sira ne'ebé mai husi transferénsia públiu MSSI nian no haruka mós pareser ba Prezidente Repúblika hodi sira kona-ba asuntu sira ne'ebé koalia ona durante enkontru kona-ba OSJ ba Instituisaun Solidariedade Sosial sira nian ne'ebé nafatin menus husi tinan ba tinan.
- Konvoka parseiru sira ne'ebé servisu iha Pilar 2 PAN-VBJ hodi halo diskusaun klean no analiza kona-ba Orsamentu Sensível ba Jéneru ne'ebé foku liu ba Orsamentu ba Uma-Mahon sira husi transferénsia públiku MSSI nian.
- Envolve iha preparasaun no aprezentasaun relatóriu sombra CEDAW nian iha Jenebra hodi envolve asuntu sensitivu sira ne'ebé relasional ho vítima VBJ.

## **Edukasaun Sedu ba Labarik**

Program Edukasaun Sedu ba Labarik, iha knua ketak ida naran Knua ba Labarik, program ida ne'e nia objetivu mak atu fornese edukasaun sedu ba labarik ho espasu ne'ebé seguru no amigável ba labarik sira hodi estimula dezenvolvementu kognitivu infantil liuhusi atividade aprende no halimar tuir ida-idak ninia idade no atu sira bele goja sira nia direitu labarik nian.

---

Importante liu ida ne'e mak Knua ba Labarik Fokupers prontu atu akomoda labarik sira ho nia objetivu importante ida mak atu tulun inan-feton sira liu sira ne'ebé vítima, feto faluk no feto sira ho rendementu mínimu atu sira bele husik hela sira nia oan iha knua ne'e atu hala'o sira nia servisu iha espasu públiku hodi kompleta ekonomia Uma-laran, servisu ho hakmatek hodi la preokupa kona-ba oan sira nia seguransa.

Programa ida ne'e nia atividade rutina iha Knua ba Labarik ho labarik sira loron no oras servisu. Knua ba Labarik Fokupers rekoñese husi Ministériu Edukasaun, iha professora sira ne'ebé kualifikada. Atividade iha Knua ba Labarik hahú husi Segunda to'o Sesta, iha oras no loron servisu hodi bele halimar no aumezmu tempu aprende hamutuk ho maluk sira.

Kada tinan Knua ba Labarik akomoda labarik 60-70 ho idade tinan 2 - 6 molok sira tama iha ensinu Báziku, tinan ida ne'e Knua ba Labarik Fokupers akomoda labarik hamutuk na'in 66, ho envolvimentu feto na'in 68 no mane 38, iha mós labarik autis na'in 2 no iha mós vítima sira nia oan ne'ebé asesu ba Knua ba Labarik. Sira la'os deit aprende iha sala laran maibé sira mós aprende hodi explora natureza no kriausaun seluk nia furak iha liur depende planu didátika no possibilidade professora sira nian.

Knua ba Labarik Fokupers mós estende ninia atividade iha nível suku, hala'o iha Sede Suku iha Munisípiu rua mak Dili iha Becora Mota-ulun, Kaikoli, Manleu no Madohi, no iha Bobonaro mak Ritabou no Tunubibi. Ida ne'e hala'o ho objetivu atu lori atividade labarik nian besik liutan ba comunidade nu'udar pasu ida atu aprende no halimar aumezmu tempu halimar hamutuk ho sira nia maluk sira seluk, atividade ne'e hala'o semana ida dala rua.

Iha Knua ba Labarik mós hala'o enkontru regular ho inan-aman sira ho rona inan-aman sira nia komentáriu kona-ba oan sira nia dezentvolvimentu no progresu hafoin fila ba uma, iha mós diskusaun ho tópiku oin-oin bai nan-aman sira relaciona ho equalidade jéneru, VBJ no protesau labarik ho objetivu atu sira bele tulun hodi aplika valor hirak ne'ebé Fokupers promove no kuda iha eskola. Liu ida ne'e, atividade Aprende no Halimar iha Knua ba Labarik hahú konsidera hanesan atividade transversal hodi kompleta atividade husi programa seluk hodi tulun inan sira bele hola parte iha atividade sira comunidade nian no bele konsentra ho diak.